

03/10/2001

In Conversation papar wawancara dengan pemimpin Asean

Suzan Ahmad

PADA kali pertama dalam sejarah penyiaran Asia Tenggara, empat stesen televisyen swasta serantau bergabung menjayakan penerbitan program bual bicara dengan pemimpin serantau, In Conversation.

Program sejam ini diterbitkan oleh Jabatan Berita dan Hal Ehwal Semasa TV3 dan Mohd Azri Haji Atan selaku penerbit.

Stesen televisyen lain yang turut mengambil bahagian ialah iTV Thailand, RCTI Indonesia dan ABS-CBN Filipina. Ia sekali gus memberi peluang kepada lebih 300 juta penonton di rantau Asia Tenggara menyaksikan program itu.

Objektif penerbitan In Conversation ialah untuk memberi ruang kepada pemimpin rantau ini mengungkap pemikiran masing-masing bagi tatapan rakyat dan masyarakat serantau.

Ia juga bertujuan memecah dominasi media asing terutamanya media Barat yang cenderung menyiarkan temu bual bersama pemimpin rantau ini secara selektif dan hanya menepati kehendak stesen atau agenda media masing-masing sahaja.

Justeru, memandangkan terdapatnya kekosongan wadah, TV3 mengambil daya usaha untuk menerbitkan program bual bicara eksklusif ini. Antara fokus perbincangan termasuk pencapaian serantau dalam bidang politik, ekonomi, sosial dan ehwal semasa.

Bagi episod pertama, Perdana Menteri Malaysia, Datuk Seri Dr Mahathir Mohamad, dipilih menjadi tetamu undangan.

Ia disiarkan malam tadi, jam 9 malam. Selain Dr Mahathir, beberapa pemimpin negara Asean lain sudah pun memberikan persetujuan menjadi tetamu program ini, antaranya Perdana Menteri Thailand, Thaksin Shinawatra dan Perdana Menteri Singapura, Goh Chok Tong.

Antara pemimpin lain yang sedang dihubungi ialah Presiden Filipina, Gloria Macapagal Arroyo serta dan Presiden Indonesia, Megawati Sukarnoputri dan beberapa pemimpin terkenal lain.

Episod kedua yang membabitkan Perdana Menteri Thailand, Thaksin Shinawatra bakal dirakam dalam studio iTV di Bangkok, Thailand, pertengahan Oktober ini.

Rancangan bulanan ini diacarakan Pengurus Besar Kanan Jabatan Berita dan Ehwal Semasa TV3, Datuk Chamil Wariya; Pengarang Berita Luar Negara iTV Thailand, Chib Jitniyom; Penerbit Eksekutif Berita, RCTI Indonesia, Roy Tindage; serta Ketua Koresponden dan Penyampai Berita ABS-CBN Filipina, Korina Sanchez.

Program 13 episod menarik itu tajaan oleh Tenaga Nasional Berhad.

(END)